

PARLIMEN MALAYSIA

PEMBERITAHU PERTANYAAN DEWAN RAKYAT

**PERTANYAAN : LISAN**  
**DARIPADA : DATO' SERI ANWAR IBRAHIM [PERMATANG PAUH]**  
**TARIKH : 16 JUN 2014 (ISNIN)**  
**SOALAN : Dato' Seri Anwar bin Ibrahim meminta MENTERI PERTANIAN DAN INDUSTRI ASAS TANI menyatakan apakah langkah-langkah yang telah diambil oleh Kerajaan bagi menaiktaraf kebajikan penanam-penanam padi di Malaysia.**

**JAWAPAN**

Tuan Yang Dipertua,

Langkah-langkah terkini yang telah diambil Kerajaan dalam usaha menaiktaraf kebajikan para penanam padi di Malaysia adalah melalui pelaksanaan program Jihad Memerangi Orang Tengah sebagai salah satu langkah untuk meningkatkan pendapatan pesawah. Beberapa inisiatif telah diumumkan seperti harga padi yang diselaraskan pada kadar RM1,200 per tan metrik untuk mengatasi masalah manipulasi harga oleh orang tengah. Disamping itu, sebanyak 31 Pusat Belian Padi (PBP) yang telah beroperasi di seluruh negara melalui urus niaga padi di pusat berkenaan.

Kerajaan juga telah menyediakan pelbagai subsidi dan insentif bagi menampung kos pengeluaran padi kepada pesawah-pesawah. Melalui usaha ini, secara tidak langsung ia dapat membantu pesawah untuk meningkatkan hasil pengeluaran dan taraf hidup pesawah. Pihak Kerajaan, melalui pelbagai jabatan dan agensi teknikal juga turut menyediakan kemudahan teknologi baru disamping menggalakkan Amalan Pertanian Baik [*Good Agriculture Practice (GAP)*] menerusi pengurusan tanah, pengurusan air yang lebih efektif, pengurusan tanaman mengikut jadual penanaman yang telah ditetapkan serta kawalan penyakit secara bersepadu.

**NO. SOALAN: 62**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : DATUK KOH NAI KWONG [ ALOR GAJAH ]**

**TARIKH : 16 JUN 2014**

**RUJUKAN : 6875**

**SOALAN:**

**Datuk Koh Nai Kwong [ Alor Gajah ]** minta **MENTERI DALAM NEGERI** menyatakan apakah langkah-langkah proaktif yang diambil oleh Polis Diraja Malaysia untuk mengenalpasti penjenayah dan melakukan tangkapan untuk kes-kes ragut dan rompakan.

## **JAWAPAN**

**Tuan Yang di Pertua,**

**Pihak Kementerian dan PDRM sentiasa komited dalam mengendalikan kes-kes jenayah ragut dan rompakan selaras dengan objektif kerajaan untuk untuk menurunkan kadar jenayah seluruh negara sebanyak 5 % setahun. Dalam mencapai objektif ini pihak PDRM menjalankan beberapa strategi dalam usaha mencegah jenayah. Di antaranya adalah:-**

- i) Dalam usaha memerangi jenayah dan menangkap penjenayah, PDRM telah mewujudkan Unit Risikan bersepadu (*Central Intelligence Unit - CIU*) dengan menggunakan konsep "*Intelligence lead policing*" sebagai pusat pengumpulan maklumat dan risikan jenayah. Risikan dan analisis jenayah yang dijalankan akan digunakan untuk mengesan dan menangkap penjenayah atau merancang tindakan pencegahan jenayah yang lebih efektif.**
  
- ii) Sebagai usaha yang lebih berkesan dan memberi impak yang mendalam dalam aktiviti pencegahan jenayah, PDRM telah menubuhkan Jabatan Khas iaitu Jabatan Pencegahan Jenayah yang mana jabatan ini akan memberi fokus program pencegahan jenayah dengan melibatkan sumber dalaman dan juga penglibatan masyarakat. Antara fungsi Jabatan Pencegahan Jenayah adalah:-**

- a) Memastikan strategi dan pendekatan secara proaktif dan bersepadu bagi mencegah jenayah daripada berlaku.
  - b) Mendidik serta membudayakan masyarakat tentang tanggungjawab bersama mencegah jenayah.
  - c) Menghapuskan peluang perlakuan jenayah.
  - d) Menghapuskan hasrat untuk melakukan jenayah.
  - e) Menangani dan mengurau persepsi *fear of crime*.
  - f) Memainkan *consultative role* kepada komuniti, institusi pendidikan, institusi perniagaan, agensi kerajaan dan NGO.
- iii) Menyelaras operasi secara berterusan dengan memberi tumpuan terhadap kes-kes ragut dan samun di tepi jalan (Ops Rentap), curi kenderaan ( Ops Lejang), pecah rumah (Ops Pintu) dan kes- kes yang melibatkan senjata api (Ops Laras, Ops Api) sebagai sebahagian daripada usaha melaksanakan program *National Key Result Area (NKRA)*.
- iv) Pihak polis telah melancarkan Op Cantas Khas bermula pada 17 Ogos 2013, bertujuan untuk melumpuhkan kegiatan kongsi gelap dan gangsterisme yang mempunyai kaitan yang rapat dengan jenayah rompakan sama yang menggunakan senjata api atau tanpa senjata api. Dalam Op Cantas ini, pihak polis telah berjaya menangkap mereka yang terlibat dengan kongsi gelap serta merampas pelbagai

**jenis senjata yang dipercayai digunakan untuk melakukan jenayah.**

**Hasil daripada tindakan melalui risikan yang buat dan juga maklumat yang diperolehi daripada masyarakat, pihak polis telah berjaya menangkap warga tempatan dan warga asing yang terlibat dengan jenayah ragut dan rompakan. Statistik kes jenayah ragut dan rompakan dan jumlah pemjenayah yang ditangkap bagi tahun 2013 dan tahun 2014 (sehingga April) seperti berikut:-**

<b>KESALAHAN</b>	<b>KES TAHUN 2013</b>	<b>SELESAI TAHUN 2013</b>	<b>PERATUS SELESAI</b>	<b>JUMLAH TANGKAP SEMUA BANGSA</b>	<b>TANGKAP W/ TEMPATAN</b>	<b>TANGKAP W/ASING</b>
SAMUN TANPA BERSENJATAPI	20,212	10,777	53.3	7,110	6,032	1,078
RAGUT	2,118	989	46.7	640	355	285
<b>JUMLAH</b>	<b>22,330</b>	<b>11,766</b>	<b>52.7</b>	<b>7,750</b>	<b>6,387</b>	<b>1,363</b>

<b>KESALAHAN</b>	<b>KES JAN-APR 2014</b>	<b>SELESAI JAN-APR 2014</b>	<b>PERATUS SELESAI</b>	<b>JUMLAH TANGKAP SEMUA BANGSA</b>	<b>TANGKAP W/ TEMPATAN</b>	<b>TANGKAP W/ASING</b>
SAMUN TANPA BERSENJATAPI	6,241	3,091	49.5	3,914	3,539	375
RAGUT	972	484	49.8	450	367	83
<b>JUMLAH</b>	<b>7,213</b>	<b>3,575</b>	<b>49.6</b>	<b>4,364</b>	<b>3,906</b>	<b>458</b>

**Pihak polis berkeyakinan dengan kepakaran yang di miliki oleh anggota polis untuk mengesan jenayah dan juga kerjasama yang berterusan daripada masyarakat untuk menyalurkan**

**maklumat, matlamat untuk mengurangkan jenayah dalam negara akan tercapai.**